

- 1<sup>r</sup> Wer meynt gott well jnn stroffen nytt
- 2<sup>r</sup> Dar vmb / das er beyt lange zyt
- 3<sup>r</sup> Den schlecht der tunder dick noch hüt



### von verachtung gottes

- 1 Der ist eyn narr / der gott veracht
- 2 Vnd wider jn vieht / tag vnd nacht
- 3 Vnd meynt / er sy den menschen glich
- 4 Das er schwig / vnd loß fattzen sich

5 Dann mancher sich dar vff verlosßt  
 6 So jm der tunder nit anstoßt  
 7 Sin huß so bald / vnd schlecht jnn dott  
 8 So er syn boßheyt hatt verbrocht  
 9 Oder nit styrbet gâhelich  
 10 Das er nit me dürff vörchten sich  
 11 Dann gott hab syn vergessen doch  
 12 Das er so lang jor beittet noch  
 13 Er werd jm dar zû lonen ouch  
 14 Do mit versündt sich mancher gouch  
 15 Der erst jnn synen sünden verhart  
 16 Dar vmb / das jm gott ettwan spart  
 17 Meynt er jm gryffen an den bart  
 18 Als ob er mit jm schympfen wolt  
 19 Vnd gott vertragen sollches solt /  
 20 Hõr zû o dor / würd witzig narr  
 21 Verloß dich nit vff solche harr  
 22 Es ist worlich eyn grusam bandt  
 23 Welcher gott fallet jnn syn handt  
 24 Dann ob er joch lang zyt din schont  
 25 Dir würt des beittens wol gelont  
 26 Manchen loßt sünden got der herr  
 27 Das er jn dar noch stroff dest mer  
 28 Vnd jm bezal das / vnd das eyn  
 29 Man spricht es mach den seckel reyn /  
 30 Mancher der styrbt jnn sünden kleyn  
 31 Dem dût gott solche gnad dar an  
 32 Das er jnn zyttlich nymbt von dan  
 33 Do mit er nit vil sünd vff lad /  
 34 Vnd grösser werd der selen schad

p4r

p iiij

---

8 verbrocht *GW5046 GW5047* ] volbrocht *GW5041*

35 Gott hat all ruwern zů geseitt  
 36 Ablaß / vnd syn barmhertzikeyt  
 37 Keym sünder er doch ye verhyeß  
 38 Das er jnn so lang leben ließ  
 39 Biß er rüwt / vnd nãm besserung an  
 40 Oder das er rüw würd entpfan /  
 41 Gott geb eym dick syn gnad noch hüt  
 42 Vnd will jm doch *morn* geben nüt /  
 43 Ezechias von gott erwarb  
 44 Das vff syn gsatz zyel er nit starb  
 45 Sunder lebt noch dann fünffzehen jor /  
 46 Balthesar durch sünd sym zyel kam vor  
 47 Die handt / von aller freüd jnn treib  
 48 Die Mane / Phares / Thetel schreib  
 49 Er was zů lycht an dem gewyecht  
 50 Dar vmb wart jm entzuckt syn lyecht  
 51 Vnd merckt nit das syn vatter vor  
 52 Durch gott gstrofft / vor manchem jor  
 53 Zů besserung vnd büß sich kert  
 54 Dar vmb wart er von gott erhört  
 55 Das er jn vyehes gestalt nit starb  
 56 Durch rüw / er gnad vnd zyel erwarb  
 57 Eym yedem ist gesetzt syn zyt  
 58 Vnd zal der sünd / dar über nüt  
 59 Dar vmb zů sünden nyeman yl  
 60 Wer vil sündt der ist bald zům zyl  
 61 Vil syndt / dott yetz jn disem jor  
 62 Hetten sie sich gebessert vor  
 63 Vnd jr stundglaß vmb kört by zyt  
 64 Der santt wer vß geloffen nitt  
 65 Sie lebten noch on zwyfel hüt

---

42 morn ] fehlt GW5046 GW5047 57 yedem GW5046 GW5047 ] yeden GW5041